

Carta najndyee na seiljeii Pedro

Pedro seicwanoom carta na m'aⁿ nn'aⁿ na t'oom'ndye

1 ¹ Maja Pedro na cwiluiindyō apóstol, ts'aⁿ na majñom Jesucristo ts'iaaⁿ 'naaⁿ'aⁿ matseiljeiya ñ'oomwaa na matseicwanoⁿya juuna' ndaa' 'o na jnda t'oom'ndyo', na m'aⁿ'yo' l'ondaa Ponto, Galacia, Capadocia, Asia ñ'eⁿ Bitinia, ² ndaa' 'o na jaach'ee xuee tjeii'ñe Tsotyaaⁿ Ty'ooots'om 'o na laxmaⁿ'yo' cwentaaⁿ'aⁿ cha'xjeⁿ na seijndaa'ñê. Cautyja 'naaⁿ' Espíritu Santo tqueⁿñooⁿ 'o na nlaxmaⁿ'yo' na calacandaⁿ'yo' jo noom ndo' na nlaxmaⁿ'yo' na lju' n'om'yo' ñequio nioom' Jesucristo. Quiaa Ty'ooots'om na candaⁿ'ya nnto'ñoom'yo' naya na matseixmaaⁿ ñequio na tjaa ñomtiuu c'om'yo' jo nnoom.

Cwicautyjaa' n'ooⁿya na nntandoo'nnda'a

³ Catseit'maaⁿñena' nquii Ty'ooots'om na cwiluiiñê Tsotye Ta Jesucristo cwentaaⁿ. Jom nc'e na jeeⁿ wi' ts'oom jaa jnda s'aaⁿ na cwiluiindyoxcoo nc'e na tando'xco Jesucristo. Cautyja 'naaⁿ' jo' m'aaⁿya na cwicautyjaa' n'ooⁿya na ndaaya na nntandoo'a. ⁴ Cautyja 'naaⁿ' Jesucristo nnts'aa Ty'ooots'om na nnto'ñoom'yo' juu na nda'yo' na cwileiwe cañoom'luee na lju' tseixmaⁿ'na' na tijoom cwi'ndaa' meiⁿ xoc'uaana' cha'na ljaa'. ⁵ Nc'e na cwilayu'ya n'om'yo' ñ'eⁿ Ty'ooots'om mawañoom'm 'o ñequio najndeii na matseixmaaⁿ. Nnts'aaⁿ na ljo' hasta ncuee na macanda quia na nleitquiao' na nncwji'n'maaⁿñê 'o.

⁶ Nc'e na manquiu'yo' na macwji'n'maaⁿñê 'o, t'maⁿ cwiquiao na neiⁿ'yo', meiⁿ mach'eenaa' maniom jndye nnom nawi' na cwiwinom'yo' je'. Saa tiyo macaⁿ'na' na nntjom'yo' nmeiⁿ', ntyja nncwinomna'. ⁷ Juu na cwila'yu'ya n'om'yo' matseijomna' juuna' cha'cwijom s'om cajan, juuna' macaⁿ'na' na nncwinom'yo' nawi' cha nleitquiao' cwanti na jndana'. Juu na matseiyu'ya ts'om ts'aⁿ na ya nncwinomna' nawi', jndati tseixmaⁿ jo' nchiiti s'om cajan na cwintycwiina'. Ndo' naljo', juu na cwila'yu'ya n'om'yo', jnda teitquiao' na ya jlui'yo', quia na nncwjee'nnda' Jesucristo, nluii't'maⁿndyo' cautyja 'naaⁿ' juu jo'.

⁸ 'O meiⁿ tyoonty'ia'yo' jom, saa candya' n'om'yo' ñ'eⁿñê. Meiⁿ na nchii cwinty'ia'ndaⁿ'yo' jom, saa nc'e na jom quit'maⁿ n'om'yo', mañequiaana' na t'maⁿ waa na neiⁿ'yo'. Meiⁿ tileicaliu'yo' cwaaⁿ ñ'oom na ndu'yo' na neiⁿ'yo'. Ndo' juu na neiⁿ'yo' matseit'maaⁿñena' Ty'ooots'om. ⁹ Ee nc'e na cwila'yu'yo' ñ'eⁿ Jesucristo, cwito'ñoom'yo' na macwji'n'maaⁿñê Ty'ooots'om añaⁿ 'naⁿ'yo'.

¹⁰ Ncuee na teinom nquiee profetas na tyoñequia ñ'oom' Ty'ooots'om cautyja 'naaⁿ' na quia nluii, tyola'naaⁿ'na ñ'oom'm ndo' tcuu tcuu ñe'cala'nqⁿ'na cautyja 'naaⁿ' na nncwji'n'maaⁿñê nn'aⁿ, ndo' nc'e naya

na matseixmaaⁿ ñejlaneiⁿ na cantyja 'naaⁿ na'. ¹¹ Nquii Espíritu na matseixmaⁿ Cristo na tyom'aaⁿ quii' n'omna, tyuaa' t'mooⁿ ndaa naⁿ ñeeⁿ nawi' na ntjom Cristo ndo' na ndaquia nntseit'maaⁿ ñena' juu. Tcuu tcuu tyol'ueena 'ñeeⁿ ts'aⁿ tsaⁿ ñeeⁿ na t'moⁿ Espíritu ndaana ndo' cwaaⁿ xjeⁿ nncwjee'. ¹² Naⁿ ñeeⁿ t'moⁿ Ty'ooots'om ndaana na tixocaluiiñe Cristo xjeⁿ na cwita'ndo' nquieena. T'mooⁿ ndaana na nnc'oom juu xjeⁿ na m'aaⁿ jaa. Jo' chii ndyumeiⁿ ñe, ñequio na mateijndei Espíritu Santo na jñom Ty'ooots'om, cwiñe'quia nn'aⁿ ñ'oom naya ndaa'yo' cantyja 'naaⁿ Jesucristo. Jeeⁿ cajnda ñ'oom nayawaañe hasta matseiqueeⁿ na' n'om ángeles na ñecala'noⁿ na juuna'.

Ty'ooots'om maqueeⁿ ñê na c'ooⁿ na lju' n'ooⁿ

¹³ Queⁿ tyeⁿ yo' cantyja na cwila'tiuu'yo'. Cal'a' cheⁿ ncjo'yo' xjeⁿ na ñe'cwii n'om'yo'. C'om'yo' na ñe'cwii waa na quit'maⁿ n'om'yo' cantyja naya na nnts'aa Ty'ooots'om 'o quia na ndyonnda' Ta Jesucristo. ¹⁴ Nc'e na cwiluiindyoy' tseinda Ty'ooots'om na cwila'candaa'ndyo', catjei'ndyo' cantyja 'naaⁿ joo ts'iaaⁿ na ñejla'jomndyo' cwi'tjoocheⁿ na ta'jnaⁿ yo' jom. ¹⁵ Nquii Ty'ooots'om na t'maaⁿ 'o cwiluiiñê na lju' ts'oom. Jo' chii mati 'o c'om'yo' na lju' n'om'yo' jo nnoom cantyja cha'tsoti na cwitsam'aⁿ yo'. ¹⁶ Ee teiyo teiljei ñ'oom' Ty'ooots'om na matsona': "Nc'e na ja cwiluiindyoy' na lju' ts'ooⁿ ya, mati 'o c'om'yo' na lju' n'om'yo'."

¹⁷ Nc'e na cwilcwi'yo' Tsotye'yo' na nqueⁿ xocats'aaⁿ na neiiⁿ eⁿ cwii ts'aⁿ saa cwiicheⁿ tineiⁿ eⁿ, jo' chii c'om'yo' na nquia'yo' jom yocheⁿ na m'aⁿ yo' ljoone cha'cwijom nn'aⁿ na cwe' cwiueya. ¹⁸ Juu na ñet'om'yo' cwi'tjoocheⁿ na jla'yu'yo' ñ'eⁿ Ty'ooots'om na jeeⁿ cwe' ts'iaa'ndyo jo', tjei'ñ'maaⁿ ñê 'o cantyja 'naaⁿ na', joo jo' t'mooⁿ welo'yo' ndaa'yo'. Manquiu'jndaa'ndyo' na juu na tjei'n'maaⁿ ñê 'o, nchii ñjoml'ua juuna' ñequio 'naⁿ na cwindyue, cha'na s'om cajaan oo s'om xuee, ¹⁹ 'o ñjoml'uandyo' ñequio nioom' Cristo na jeeⁿ ndya' jnda, na tquiaañe cheⁿ nqueⁿ na jla'cuee'na jom cha'cwijom cwii catsmaⁿ na cwiñe'quia nn'aⁿ na cwila't'maaⁿ ndyena Ty'ooots'om, na meiⁿ cwii ticatseixmaaⁿ na ticandaa'ñê, cha'cwijom catsmaⁿ na canchii'ñeñ'eⁿ. ²⁰ Cwi'tjoocheⁿ na nlqueⁿ Ty'ooots'om tsjoomnancue, saa jnda tqueeⁿ na nntjom Cristo na ljo'. Saa hasta ndyumeiⁿ tquiaa Ty'ooots'om na teitquioo'ñê cha nnteijndeiina' 'o. ²¹ Je' cantyja 'naaⁿ Jesucristo m'aⁿ yo' na cwila'yu'yo' ñ'eⁿ Ty'ooots'om. Manquii'tyeeⁿ tquiaaⁿ na tando'xco juu jnda na tue', ndo' seit'maaⁿ ñê juu. Ndo' nc'e na ljo' cwila'yu'ya n'om'yo' ñ'eⁿ ñê, ndo' cwi'cantyjaa' n'om'yo' jom.

²² Ndo' je', nc'e na cwito'ñoom'yo' ñ'oom na mayuu', jo' na lju' añaⁿ yo' cha xcwee' n'om'yo' cwil'a'yo' na cwilawi' n'om'yo' nn'aⁿ yo' na cwila'yu'. Ndo' matsona' na c'om'yo' na wi' n'om'yo' cwii ndo' cwiindyoy' ñequio na lju' n'om'yo' ndo' ñequio cha'waa na jnda'yo'. ²³ Ee jnda tuiixcondyo' cwe' nchii cantyja 'naaⁿ nn'aⁿ na cwiwje. 'O jnda

tuiixcondyo' cantyja 'naaⁿ ñ'oom' Ty'oots'om na wando', cwii na m'aaⁿ ndo' m'aaⁿ.

²⁴ Ee ñ'oom' Ty'oots'om na seiljeii Isaías, matsona':

Cha'tsondye nn'aⁿ matseijomna' joona cha'cwijom tso jndaa.

Ndo' juu na t'maⁿ na cwiluiindyena matseijomna' juuna' cha'cwijom lja'a' tso jndaa.

Saa quia na cwicaaⁿ tso jndaa, cwiquiaa lja'a'na',

²⁵ saa ñ'oom' Ty'oots'om ticantycwii na m'aaⁿna'.

Ndo' juu ñ'oom'ñeeⁿ na tyoñequia nn'aⁿ ndaa'yo' tseixmaⁿna' ñ'oom na nlui'n'maaⁿndye añmaaⁿ nn'aⁿ.

2 ¹ Nc'e na luaa', catjei'ndyo' cantyja 'naaⁿ cwii cwii nnom natia, cha'tso na maquiun'na'na', cha'tso na we waa na mach'ee ts'aⁿ, cha'tso na cwila'taa' n'om nn'aⁿ nc'iaana, cha'tso na cwitio'ñ'oom nn'aⁿ nt'omcheⁿ. ² Cha'xjeⁿ yo'ndaa na 'ndaandye cwil'ueena ndaatsuu' tsondyeena, cjoo' n'om'yo' na cal'ue'yo' ndaatsuu ñequii' cantyja 'naaⁿ Espíritu, cha cantyja 'naaⁿ jo' nntsanajnda'yo' na laxmaⁿ'yo' nn'aⁿ na macwji'n'maaⁿñe Ty'oots'om, ³ xeⁿ na aa mayuu'cheⁿ jnda cwiqueⁿ'yo' cwenta na jeeⁿ ya cwiluiiñe nqueⁿ na matsa'ntjoom 'o.

Cristo cwiluiiñê tsjo' na wando'

⁴ Jo' chii cala'candyoo'ndyo' jo nnom nqueⁿ na cwiluiiñê tsjo' na wando', nqueⁿ na tjeii' nn'aⁿ cwenta na xocwil'ueñê, saa tjei' Ty'oots'om jom na l'ueñê ndo' jnda ntyjii jom. ⁵ Ndo' mati 'o, na cwiluiindyoy' ljo' na cwita'ndo', quiandyoy' na mawil'uee'ñe Ty'oots'om 'o na cwiluiindyoy' wats'om yuu na m'aaⁿ Espíritu, cwiluiindyoy' cwii tmaaⁿ ntyee na lju' n'om, na cantyja 'naaⁿ Jesucristo cwila't'maaⁿndyo' Ty'oots'om, ts'iaaⁿ cantyja 'naaⁿ Espíritu na jeeⁿ cwijaawee' ts'oom.

⁶ Ee naquii' ñ'oom' Ty'oots'om na teiljeii matsona':

Quii' tsjoom Sión maquaⁿya cwii tsjo' na tseixmaⁿna' tsjo' nquii tsiaⁿtsjo' w'aa.

Matso Ty'oots'om:

Ja tjeii'a jom cwentaya ndo' jeeⁿ ndya' jnda cwiluiiñê;

Meiⁿñeeⁿcheⁿ ts'aⁿ na matseiyu' ñ'eⁿñê,

tijoom xuee nnts'aana' na cwe' ts'iaaⁿndyo na ñentyjaa' ts'om jom.

⁷ Cantyja 'naⁿ 'o na cwila'yu'yo' ñ'eⁿ nqueⁿ na cwiluiiñê tsjo'waa, jeeⁿ jnda cwiluiiñê saa cantyja 'naaⁿ joo nn'aⁿ na ticalayu' ñ'eⁿñê, matseicandaa'ñena' na matso ñ'oom' Ty'oots'om na teiljeii:

Juu tsjo' na tquiee' luañê na cwil'a w'aa,

tseixmaⁿna' tsjo' nqui tsiaⁿtsjo'.

⁸ Ndo' mati waa cwiicheⁿ ñ'oom na matseineiⁿna' cantyja 'naaⁿaⁿ:

Jom matseijomna' cha'cwijom cwii tsjo' ty'a, cwii tsjo' na matseiquiaana' nn'aⁿ.

Tquiaandyena ee tilañ'oom'ndyena ñ'oom cantyja naaⁿaⁿ ee luaa' teijnoomna.

Nn'aⁿ na cwiluiindy e cwentaa' Ty'ooots'om

⁹ Saa 'o cwiluiindy' tmaaⁿ nn'aⁿ na macwji' Ty'ooots'om cwentaaⁿaⁿ, cwii tmaaⁿ ntyee na cwindye'ntjom'yo' nnom nqueⁿ na tjacantyja cwiluiiñê na matsa'ntjoom, cwiluiindy' nn'aⁿ cwii tsjoomnancue na lju' ts'om, cwii tmaaⁿ nn'aⁿ na m'aⁿyo' cwentaaⁿaⁿ, nmeiiⁿ laxmaⁿyo' cha nntjei'yuu'ndyo' na jeeⁿ t'maⁿ ts'iaaⁿ mach'eeⁿ ñ'eⁿndyo', nqueⁿ na t'maaⁿ 'o na calui'yo' naquii' najaaⁿ ndo' na nlajomndyo' ñequio na neiⁿncoo' naxuee na cwiluiiñê. ¹⁰ Ñet'om'yo' na tîlaxmaⁿyo' tmaaⁿ cwentaa' Ty'ooots'om, saa je' je' cwila'xmaⁿyo' juuna'. Jaach'eeti xuee tîcaliu'yo' na candya' ts'oom 'o, saa je' je' cwiliu'yo' na ljo' jom ñ'eⁿndyo'.

Xcwe c'om'yo' cha ndaa ndye'ntjom'yo' nnom Ty'ooots'om.

¹¹ 'O nn'aⁿya na jeeⁿ wi' ts'ooⁿya, nc'e na cwiluiindy' cha'cwijom nn'aⁿ na cwe' cwiquieya, ndo' cwe' cwiwinom'yo' tsjoomnancue, macaⁿa ndaa'yo' na tañequiandy' na joo na l'ue n'om seii'yo' na nnc'oochona' 'o xjeⁿ 'naaⁿna'. ¹² Xcwe c'om'yo' quii'ntaaⁿ nn'aⁿ na tic'om nacje 'naaⁿ Ty'ooots'om, ee na nl'a'yo' na ljo' meiiⁿ na tia ñ'oom cwilaneⁿna nacjo'yo' na cha'cwijom tiann'aⁿndyo', nlqueⁿna cwenta naya na cwil'a'yo' ndo' xuee quia na ñnequiana cwenta nnom Ty'ooots'om, nla't'maaⁿndyena jom cantyja 'naⁿyo'.

¹³ Ndo' cwe' nc'e na cwiluiindy' cwentaa' nquii Ta Jesús, jo' chii catue'ndyo'cje'yo' ndaa cha'tso nn'aⁿ na m'aⁿ n'iaaⁿ. Najndyee nnom nquii tsaⁿmaⁿts'iaaⁿt'maⁿ, ¹⁴ ndo' mati ndaa nn'aⁿ na matsaaⁿaⁿ nacje 'naaⁿaⁿ na cwic'eeⁿ n'iaaⁿ. Ee joona cwito'ñoomna ñ'oom na catu'xeⁿna nn'aⁿ na cwil'a natia. Ndo' mati cwila't'maaⁿndyena nn'aⁿ na cwil'a yuu na maty'iomyana'. ¹⁵ Ee l'ue ts'om Ty'ooots'om na cal'a'yo' yuu na maty'iomyana' cha cantyja 'naaⁿ jo' nntseicheⁿna' nn'aⁿ na tijndo' n'om na ntjeiⁿ ljo' cwil'a.

¹⁶ 'O cwiluiindy' nn'aⁿ na jnda seicandyaañe Ty'ooots'om naquii' natia. Saa ticala'tiuu'yo' na ljo' s'aaⁿ ñ'eⁿndyo' cha nncju'naaⁿñena' na nl'a'ti'yo' na ticaty'iomyana'. Cal'a'yo' cha'xjeⁿ na macaⁿna' na cal'a nn'aⁿ na cwiluiindy moso jo nnoom. ¹⁷ C'om'yo' na cwila't'maaⁿndyo' cwii cwii ts'aⁿ cantyjati na matsona'. Mati c'om'yo' na jnda nquiu'yo' nn'aⁿ na cwila'yuu'. Cala't'maaⁿndyo' Ty'ooots'om ñequio na jnda nquiu'yo' jom. Mati tsaⁿmaⁿts'iaaⁿ t'maⁿ, cala't'maaⁿndyo' jom.

Juu na tjom Cristo na wi' t'maⁿ, luaa ma'moⁿna'.

¹⁸ 'O na tyeⁿ m'aⁿyo' moso ndaa patrom 'naⁿyo', catue'ndyo'cje'yo' ndaa joona meiiⁿ aa ya nn'aⁿndyena oo aa tiann'aⁿndyena. ¹⁹ Ee jeeⁿ ya

cantyja 'naaⁿ ts'aⁿ quia mañequiaaⁿ na ñecuaa na ticaty'iomyana' ljo' matjoom ee ntyjeeⁿ xcwe m'aaⁿ jo nnom Ty'o^oots'om. ²⁰ Ee xeⁿ cwila'sei'na 'o nc'e cwii nnom na tia na jnda l'a'yo', ¿yuu waa naya 'naⁿ'yo' meiiⁿ na m'aⁿ'yo' na cwiljoya n'om'yo' na cwicacho'yo'? Saa xeⁿ cwila'quii n'om'yo' quia na cwicacho'yo' jnaaⁿ na l'a'yo' yuu na ya, luaa' jeeⁿ xcwe jo nnom Ty'o^oots'om. ²¹ T'maⁿ Ty'o^oots'om 'o na caljoya n'om'yo' meiiⁿ na nntjom'yo' nmeiⁿ, ee teinom Cristo na wi't'maⁿ, cwii na nluii'ndyo' jom na ntsantyjo'yo' 'naaⁿ nc'eeⁿ. ²² Ee meiⁿ cwii tîcatseitjooñê meiⁿ tîquinquii'nn'aaⁿ. ²³ Quia na jla'jnaaⁿ nn'aⁿ jom, tîtseilcweeⁿ eⁿ ñ'oom jnaaⁿ ndaana. Quia na ta'wi'na jom, saa tîco'weeⁿ eⁿ joona, cwe' 'ndiñetoom ñequio l'o Ty'o^oots'om na xcwe macu'xeⁿ. ²⁴ Ñequio seiiⁿ eⁿ tjachom jnaaⁿ ya nacjoo' ts'oom'naaⁿ cha nla'xmaaⁿ ya l'oo jo nnom jnaⁿ ndo' quii'ntaaⁿ nn'aⁿ nc'o^oya cha'xeⁿ na maty'iomyana'. ²⁵ Ee cwitjoocheⁿ na tajna'yo' Cristo, ñeseijomna' 'o cha'na canmaⁿ na jnda tsuundyeyoo', saa je' na jnda lcwe'yo' cantyja 'naaⁿ Cristo, mach'eeⁿ cwenta añmaaⁿ yo' cha'xeⁿ mateix'ee sto quioo'ñeeⁿ ndo' na mawañoom'm 'o.

Luaa matsona' na c'om nn'aⁿ na jnda tunco

3 ¹ 'O yolcu na m'aⁿ s'aa'yo', mala'ti' catue'ndyo'cje'yo' ndaana cha ñeeⁿ joona na tyoola'yu' ñ'oom naya 'naaⁿ Ty'o^oots'om, nc'oola'noⁿ na mayuu' juuna' nc'e na cwiqueⁿ na cwenta chiuu m'aⁿ'yo' joo ndaana meiiⁿ tyoond'u'yo' ndaana, ² ee na cwiqueⁿ na cwenta na xcwe tsam'aⁿ'yo' jo ndaana ñequio na cwila't'maaⁿ ndyo'. ³ Juu na cwilatycwi'ndyo' cantyja 'naⁿ'yo' til'a'yo' cwe' ñequio 'naⁿ na cwiwitquioo' cha'na cwila'tycwi'yo' soonqueⁿ yo', 'naⁿ na tuiina' ñequio s'om cajan oo liaa na jeeⁿ chjoom. ⁴ 'O calaxmaⁿ'yo' na tycwi'ndyo' naquii' n'om'yo', na juu na neiⁿ ncoo'ndyo' xocantycwiina', na nleitquioo' jo' laxmaⁿ'yo' quia na ya nn'aⁿ ndyo' meiⁿ titsei'ndaa'na' 'o ljo' na cwitjom'yo'. ⁵ Ee yolcu na tyom'aⁿ na tandyo xuee na tyoluiindy na lju' n'om, maluaa' tyola'xmaⁿ na, tyocantyjaa' n'omna Ty'o^oots'om ndo' tyotuee'ndyecjena ndaa s'aana. ⁶ Maluaa' tyotseixmaⁿ Sara. Tyotseicandaa'ñê nnom Abraham, ndo' tsoom nnom saaⁿ aⁿ Ta. ⁷ Ndo' mati 'o naⁿ nom na m'aⁿ lcuu'yo', c'oom'ya n'om'yo' cantyja 'naaⁿ na, cala't'maaⁿ ndyo' joona na ticwe'ntyjo na jdana cha'na 'o, saa mati nc'e juu naya na matseixmaⁿ Ty'o^oots'om na ñecwii xjeⁿ mañequiaaⁿ na laxmaⁿ na na ticantycwii na cwita'ndo'na cha'xeⁿ 'o. Luaa' cal'a'yo' cha tintseicu'na' na ñeeⁿ ñ'oom na cwitaⁿ'yo' nnoom.

Cwitjoom nn'aⁿ nawi' na cwil'ana na maty'iomyana'

⁸ Ndo' cha'tsondyo' c'om'yo' ñequio nn'aⁿ na cwila'yu' na ñecwii cwila'tiuu'yo' na jnda nquiu'yo' joona. C'om'yo' na wi' n'om'yo' cha'cwijom ñenquii ts'aⁿ ntseinda 'o. Cal'a'yo' na jndati nquiu'yo'

nt'omcheⁿ ñequio na nty'iaandyo' ñ'eⁿndyena. ⁹ Ts'aⁿ natia mach'ee 'o, tilalcwe'yo' nawi' nacjoo' tsaⁿñeeⁿ. Xeⁿ na matseijnaaⁿ'aⁿ 'o, 'o tila'jnaⁿ'yo' jom. 'O cwiicheⁿ ljo cal'a'yo', cataⁿ'yo' na catio'naaⁿñe Ty'o^oots'om ts'aⁿ na nmeiiⁿ mach'ee, ee jnda seijndaaⁿñê na 'o nnto'ñoom'yo' na nntio'ñaaⁿñê 'o. ¹⁰ Ee waa ñ'oom' Ty'o^oots'om na teiljeii na matsona':

Meiⁿquia ts'aⁿ na ñe'c'oom na ya quii'ntaaⁿ nc'iaa',

xeⁿ ntyjaa' ts'om na cha'tso xuee na wando' nnc'oom na neiiⁿ,

quia jo' cats'aañe cheⁿnquii xjeⁿ tsaa.

Tantseineiⁿ ñ'oom na tia, meiⁿ tañe'quiaañe na nntseineiⁿ cantu.

¹¹ Cwji'ñê cantyja 'naaⁿ natia, cats'aaⁿ yuu na ya,

cal'ueeⁿ na caljyaandye nn'aⁿ ñ'eⁿ nc'iaana.

Queⁿñê na cats'aaⁿ naljo'.

¹² Ee maqueⁿ Ty'o^oots'om cwenta nn'aⁿ na cwiluiindy cwentaaⁿ'aⁿ,

ndo' mañeeⁿ ñ'oom na cwilaneiⁿna nnoom,

saa nn'aⁿ na cwil'a natia, m'aaⁿ nacjoo naⁿñeeⁿ.

¹³ Ee xeⁿ ñequii'cheⁿ cwil'a'yo' na ya, ¿ñeeⁿ ndaa nnts'aa nawi'ñe ñ'eⁿndyo'?

¹⁴ Saa meiⁿ xeⁿ cwiwinom'yo' nawi' na jnda l'a'yo' naya,

matio'naaⁿñe Ty'o^oots'om 'o. Meiⁿ ncwii ts'aⁿ tinc'om'yo' na nquia'yo'

juu, tila'catyuendyo'. ¹⁵ 'O naquii' n'om'yo' cala't'maaⁿndyo Cristo na

cwiluiñê na matsa'ntjoom 'o. Ñequii'cheⁿ c'omc'eendyo' na nt'o'yo'

nnom ts'aⁿ na mawax'ee chiuu waa na cwicantyjaa' n'om'yo' jom,

¹⁶ c'om'yo' cha'xjeⁿ na macaⁿna' cha meiⁿcwii ñomtiuu tacandii'

nquiu'yo' cha joo nn'aⁿ na tia cwilaneiⁿna cantyja chiuu cwitsaam'aⁿ'yo'

na cwilayu'yo' ñ'eⁿ Cristo, nc'omna na jnaaⁿna cantyja 'naaⁿ ñ'oom na cwilaneiⁿna.

¹⁷ Ee xeⁿ na l'ue ts'om Ty'o^oots'om, yati na co'wi'na' ts'aⁿ nc'e mach'ee

yuu naya, nchiiti na co'wi'na' juu na mach'ee natia. ¹⁸ Cristo ñejom

tjoom nawi' nc'e jnaaⁿ jaa, tacaⁿna' na cue'nnaaⁿ'aⁿ. Jom na

ticatseixmaaⁿ jnaⁿ tueeⁿ'eⁿ cwentaa jaa nn'aⁿ jnaⁿ, cha ndaa nncwjaaⁿñê

jaa cwentaa' Ty'o^oots'om. Cantyja 'naaⁿ seiⁿ'eⁿ tueeⁿ'eⁿ, saa nc'e espíritu

'naaⁿ'aⁿ tando'xcoom. ¹⁹ Ndo' cantyja 'naaⁿ espíritu na tseixmaaⁿ,

tjanquiaaⁿ ñ'oom ndaa espíritu 'naaⁿ l'oo na m'aⁿ jnaⁿ, ²⁰ na joona

xuee'ñeeⁿcheⁿ ñejla'tjoondyena yocheⁿ na tyom'aaⁿ Noé. Xjeⁿñeeⁿ

tyomeiⁿndoo'nty'iaañe Ty'o^oots'om na calcwe' n'omna' yocheⁿ na tjaluii

w'aandaa, na cantyja 'naaⁿ juuna' ñe'ñeeⁿ ts'aⁿ jlui'n'maaⁿñe naquii'

ndaatioo'ñeeⁿ. ²¹ Ndaatioo'ñeeⁿ matseijomna' juu ndaa na

cwiwits'oomndyo, na cantyja 'naaⁿ jo' laxmaaⁿya nn'aⁿ na

cwilui'n'maaⁿndyo je'. Na cwiwits'oomñe ts'aⁿ tica'moⁿna' cantyja 'naaⁿ

na nlju'ñê, cantyja 'naaⁿ juuna' ma'moⁿna' na macaⁿ ts'aⁿ na tic'oom na

m'aaⁿ m'aaⁿ ts'oom jo nnom Ty'o^oots'om ndo' na tseixmaⁿ ts'aⁿ na

cwilui'n'maaⁿñe nc'e na tando'xco Jesucristo. ²² Tjalcweeⁿ'eⁿ

cañoom'luee ndo' wacatyeeⁿ ntyjaa' ts'o Ty'ooots'om ntyjaya yuu
cwituee'ndyecje cha'tso ángeles ñequio nt'omcheⁿ nnom na
cwiluiitquiendye ndo' m'aⁿ nt'omcheⁿ na waa na jnda la'xmaⁿ.

Candya'ntjooⁿya cantyjati naya na cwicandaaya nnom Ty'ooots'om

4 ¹ Jo' chii, cha'xjeⁿ na tco'wi'na' Cristo ñequio seiiⁿeⁿ, mati 'o
la'xmaⁿyo' na ñnequiandyo' na co'wi'na' 'o, ee ts'aⁿ na
maco'wi'na' juu ñequio seii', jnda ty'ioo'ñê na ñe'queⁿ jnaⁿ xjeⁿ jom,
² cha cantyjati xuee na wañoom'm nnc'oom cha'xjeⁿ na l'ue ts'om
Ty'ooots'om, nchii cha'xjeⁿ na queeⁿ ts'om seii' ts'aⁿ. ³ Tco xuee na
ñel'a'yo' cha'xjeⁿ cwil'a nn'aⁿ na tic'om nacje 'naaⁿ Ty'ooots'om,
ñel'a'yo' natia na cwil'a naⁿñeeⁿ, tyom'aⁿyo' na queeⁿ n'om'yo'
nt'omcheⁿ, ñejla'xmaⁿyo' nn'aⁿ candyee, tyocwa'jndoo'ndyo' ndo'
tyowe'yo', ndo' tyola't'maaⁿndyo' joo na cwe' nn'aⁿ l'a. ⁴ Saa je' nc'e na
ticalajomndyo'ti'yo' ñequio na mawinom'na' natia na cwil'a naⁿñeeⁿ, jo'
matseñ'eeⁿñena' joona ndo' tia ñ'oom cwilaneiⁿna cantyja 'naⁿyo'.
⁵ Saa ncue'ntyjo xjeⁿ na nlca'na' na ñnequiana cwenta nnom Nqueⁿ na
m'aaⁿc'eeñê na nncu'xeeⁿ nn'aⁿ na cwita'ndo' ndo' nn'aⁿ na jnda tja.
⁶ Jo' chii ndaa l'oo jnda teineiⁿ ñ'oom' Ty'ooots'om cha cha'xjeⁿ jom
wanoom'm, mati ndaa nnta'ndo'na meiiⁿ jnda tu'xeⁿndyena cha'xjeⁿ
cwitu'xeⁿndye cha'tso nn'aⁿ.

⁷ Jnda wjaawindyoo' na nntycwii cha'tso. Nc'e na ljo' catjei'ya'yo'
cwenta chiuu cwitsam'aⁿyo', ndo' calaneiⁿyo' nnom Ty'ooots'om ñequio
na xcwee' n'om'yo'. ⁸ Ndo' na t'maⁿti c'om'yo' na xcwe na m'aⁿyo' na
jnda nquiu'yo' nc'iaa'yo' na cwilayu' ee quia na m'aaⁿ ts'aⁿ na jnda
ntyjeeⁿ x'iaaⁿaⁿ, matseit'maⁿya ts'oom ts'aⁿ na matseitjooñe nnoom.
⁹ Cateix'ee'yo' nn'aⁿ na cwe' cwiquieya l'a'yo', meiⁿ tila'ncjoo'ndyo'
ñ'eⁿndyena. ¹⁰ Cwii cwiindyoy' cwicanda'yo' cwii nnom na ndaa nl'a'yo'
ts'iaaⁿ 'naaⁿ Ty'ooots'om. Cha'xjeⁿ mach'ee cwii ts'aⁿ na matoⁿ ts'iaaⁿ,
jo' cwil'uee'ndyo'ya'yo' jndye nnom naya na matseixmaⁿ Ty'ooots'om.
¹¹ Xeⁿ macandaa' ts'aⁿ na catseineiⁿ, ñ'oom na mañequiaaⁿ cats'aana'
cha'cwijom nquii Ty'ooots'om matseineiⁿ. Xeⁿ macandaa' ts'aⁿ na
mateijneiⁿ nn'aⁿ, cats'aaⁿ naljo' ñequio najndeii na matseixmaaⁿ na
mañequiaa Ty'ooots'om. Cha'tso na cwil'a'yo' cal'a'yo' juuna' cha
caluiit'maⁿñe Ty'ooots'om nc'e Jesucristo, ee jom tseixmaaⁿ na
caluiit'maⁿñê, ticantycwii najndeii na matseixmaaⁿ. Amén.

Xeⁿ cwita'wi' nn'aⁿ 'o, nmeiiⁿ cal'a'yo'

¹² 'O nn'aⁿya na cwila'yu'yo', tints'aana' na tileicala'noⁿyo' cantyja
'naaⁿ juu na wi' na cwiwinom'yo' na juuna' matseijomna' cha'cwijom
mawinom ts'aⁿ quii' chom, tinc'oom' n'om'yo' na juu jo' t'maⁿ waa na
cwichuii'na' ñequio na cwitjoom nt'omcheⁿ nn'aⁿ. ¹³ Nchii jo' na nl'a'yo'.
'O c'om'yo' na neiⁿyo' na cwitjom'yo' na ljo' ee cantyja 'naaⁿ jo'

cwilajomndyo' na tco'wi'na' Cristo cha mati candaa' na nei'yo' quia na nleitquioo'ñê na nluiit'ma'ñê. ¹⁴ Xe' na cwitio'ñ'oom nn'a' 'o ee na cwiluiindy' cwentaa' Cristo matio'naa'ñe Ty'ooots'om 'o. Mach'ee' na ljo' ee nquii Espíritu na cwiluiiñê m'aa' naquii' n'om'yo'. Mayuu' na cwilaneina'ñ'oom ntjei' nacjoo' Cristo saa cwiluiit'ma'ñê cantyja 'na'yo'. ¹⁵ Xe' na m'aa' cwiindy' 'o na wi' matjom, nchii cats'aana' na ljo' nc'e na seicuee' ts'a', oo na mach'uee, oo cwiiche' nnom natia, mei' nchii nc'e na matii'ñe cwii nnom ñ'oom 'naa' cwiiche' ts'a'. ¹⁶ Saa xe' maco'wi'na' 'u nc'e na matseijomndyu' ñequio Cristo, ticatsona' na c'oom' na jna', 'u catseit'maa'ndyu' Ty'ooots'om na matjom' naljo'.

¹⁷ Ee jnda tue'ntyjo xje' na juu na macu'xe' Ty'ooots'om nn'a' nna'na quii'ntaa' jaa na laxmaa'ya nn'a' 'naa'a'. Ndo' xe' mana'na' ñequiondyo jaa majndeitiche' nn'a' na tilacandaa'ndye ñ'oom'm.

¹⁸ Ndo' xe' nc'uaa' nlui'n'maa'ndye nn'a' na maque'na' joo na tjaa jna' laxma', ÷chiuu nluiiyuu na nlui'n'maa'ndye nn'a' na tia nn'a'ndye ñequio nn'a' jna'? ¹⁹ Jo' chii nn'a' na wi' cwitjoomna nc'e na l'ue ts'om Ty'ooots'om, ñecwitco cal'ana na maty'iomyana', ndo' catioona añmaa'na l'o Ty'ooots'om na s'aa joona, ee cwiluiiñê na mayom'm.

Ñ'oom na matseijndo'na' n'om nn'a' cwentaa' Ty'ooots'om

5 ¹ Nncō na cwiluiitquiendyo, waa na ñe'catseijndo'a n'om' 'o na cwiluiitquiendyo' quii' ntmaa' nn'a' na macwji' Ty'ooots'om cwentaa'a', ja na ndoo'noo' na wilt'ma' na teinom Cristo, ndo' na mati nntseijomndyo na nluiit'ma'ñê quia na nndyonnaa'a' ndo' mati 'o.

² Nn'a' na cwiluiindy' canma' ntsmei' Ty'ooots'om cal'a'yo' cwentaa' joona, nchii ñequio najndeina' na nl'a'yo' ts'iaa'ñee', mei' nchii na quee' n'om'yo' s'om, saa ñequio na xcwee'ya n'om'yo' cha'xje' nquii Ty'ooots'om l'ue ts'oom, ³ Ty'ooots'om ty'ioom ts'iaa' 'o, mei' nchii nlque'ndyo' na nluiit'ma'ndyo' ndaa joo nn'a' na cwilayu'. 'O xcweya c'om'yo' jo ndaana cha ndaa nlui'ndyena 'o. ⁴ Ndo' na luaa', nque' na cwiluiitquiñê na mateix'ee' tmaa' cwentaa'a', quia na nndyonnaa'a', nnts'aa' na nnto'ñoom'yo' cwii corona na tijoom nc'uaana' na cantyja 'naa' jo' nntseit'maa'ñena' 'o.

⁵ Ndo' mati 'o nn'a' na cjeti m'a'yo', catue'ndyo'cje'yo' ndaa nn'a' na cwiluiitquiendye naquii' ts'iaa' 'naa' Ty'ooots'om. Matsona' na cha'tsondyo'ñ'e'yo' catue'ndyo'cje'yo' ndaa nc'iaa'yo' na cwila'yu' ñequio na nioom' n'om'yo', ee waa ljeii na matsona':

M'aa' Ty'ooots'om nacjoo nn'a' na cwitjeii's'andye,
cwitjeii'lcundye,

saa ndaa nn'a' na cwituee'ndyecje mañequiaa' naya na
matseixmaa'.

⁶ Jo' chii catue'ndyo'cje'yo' nacje 'naa' ts'o Ty'ooots'om na tjacantyja najndeii cwiluiiñê cha quia nncue'ntyjo xje' ntyjee' nntseit'maa'ñê 'o.

⁷ Catue'yo' nacjoo' nqueⁿ cha'tsoñ'eⁿ na matseĩ'eeⁿñena' 'o ee m'aaⁿ m'aaⁿ ts'oom 'o.

⁸ C'om'yo' na jndo' n'om'yo' ndo' cal'a'yo' cwentā, ee m'aaⁿ tsaⁿjndii na jnoom'm 'o. Matseijomna' jom cha'cwijom catsiaⁿ liom na manom manomyo' na mal'ueyo' quioo' na nlquiiyo'. ⁹ Calajnda'yo' na cwitsa'yo' nacjoom'm ñequio na cwila'yu'ya ñ'om'yo' ñ'eⁿ Ty'o^ots'om ee manquiu'yo' na cha'waa tsjoomnancue nquiee nn'aⁿyo' na cwila'yu', maljoyu na wi' cwiwinomna cha'xjeⁿ na cwtjom'yo'. ¹⁰ Ndo' ndanquia cwantindyo xuee na cwiwinom'yo' nawi'meiⁿ, manquiti Ty'o^ots'om nnts'aaⁿ na laxmaⁿyo' na candaⁿndyo', na nncwintyje'tyeⁿyo' cantyja 'naaⁿaⁿ, na nc'om'yo' na jnda'yo' jo nnoom, na tjaa'naⁿ na cwii nntseits'eina' 'o. Nnts'aaⁿ na nmeiⁿ nc'e naya na matseixmaaⁿ na m'aaⁿ na candyā' ts'oom 'o. Jnda maqueeⁿñê 'o na nla'jomndyo' yuu na caxuee na ticantycwii na cwiluiiñê nc'e Jesucristo. ¹¹ Ñenqueⁿ tintycwii na tseixmaaⁿ najneiⁿ na catsā'ntjoom. Amén.

Matseicwanom Pedro na xmaⁿndye nn'aⁿ na cwila'yu'

¹² Mateijndeiⁿ Silvano ja na teiljeiⁿ carta chjoowaañe. Macwji'a cwentā na cwiluiiñê ts'aⁿ na matseyu' na xcwee' ts'oom. Cantyja 'naaⁿ juuna' mañequiaya na t'maⁿ n'om'yo' ndo' macwji'yuu'ndyo na juu naya na matseixmaⁿ Ty'o^ots'om, cwiluiiñena' na mayuu'.

¹³ Tmaaⁿ nn'aⁿ na macwji' Ty'o^ots'om cwentaaⁿaⁿ na m'aⁿna Babilonia, na ljo'yu macwjeeⁿeⁿ joona cwentaaⁿaⁿ cha'xjeⁿ macwjeeⁿeⁿ 'o, cwila'cwanomna na xmaⁿndyo'. Ndo' mati maljo' mach'ee jndaaya ti'Marcos. ¹⁴ Cwii cwiindyo' ñequio luee'yo' quia'yo' na xmaⁿndye ntyjee'yo'.

Ndaa cha'tsondyo' na laxmaⁿyo' cwentaa' Cristo, quiaa Ty'o^ots'om na nnto'ñoom'yo' na meiⁿcwii ñomtiuu tinc'om'yo' jo ndaana.